

Schwingfäscht

Dr Itritt choschtet zää Frankä. Ä Fläschä Bier ä Fiifliber.
Dr Gander Sepp nimmd nu ä Schnupf bevor er i d'Hosä stiigd.
Dr Luissy Pail hed im erschtä Gang mid em Kaiser Noldi gschteilt.
Dr Platzspeaker gid di nechschtä Paarigä durä.
Dr Kampfrichter hold zwee zabligi Schwinger i Ring zrug.
S'Annemarie isch ägschtra wäg em Villiger Jonas cho.
Dr Durrer Bärte hed sich d'Achslä uisgränkt.
Dr Pfarrer hed i dr Predig d'Gschicht vom Tanz um's goldig Chalb verzelt.
I dr Fäschtwirtschaft isch dr suir Moscht uisgangä.
D'Alphornbläser spilid nu eis.
Vom Ring drii gheerd me de Bodemaa Oski juizä.
Er hed grad dr Schnellmaa Guido mit eme Brienzer bodiged.
Vom See uifä gheerd me d'Chuegloggä bimmelä.
Dr Amacher Kari tungged de Grind i Brunnä.
Uf dr Tribiinä isch einä vo dr Hitz oonmächtig wordä.
Dr Chäppili Bruno chund fir ne Gschteiltä nu äs Niini uber.
En achtzg Kilo schwärä Jungschwinger putzt im ene hundertzwänzg Kilo-Brockä
s'Sagmäähl vom Riggä.
S'Brunner Bethli zeigt näbedussä em Niederberger Josy wie ä Wiiberhaaggä gaad.
Im Gabetämpel suecht dr VoMoos Peter scho ä Priis uis.
«Diä gschnitzt Truä nimä de iich,» seid dr Indergand Franz.
S'Jodlercheerli «Luegisland» macht nu ä Natuirjuiz.
Im Aerni Ludi stiigd de Braatchägschmack i d'Nasä. Sii Maagä chnurred.
S'Blättler Dorli giised, wo's vo de schtarchä Arm vom Bifang Xaveri uifglipfd wird.
Dr Chilchemaa Matthias wird zum 5. Gang gägä de Wandflue Thomas uifgriefft.
Vor em Fäschtzält kracht ä Bank underem Gwicht vo drii Schwinger zäme.
Am Ring zwei warted me uf dr Brugger Hanspeter, wo nu uf Toalette hed miessä.
S'Rosli schtriichd sich mit Sunnecrème ii.
Dr Siigermuni riisd am Hälslig.
Dr Feldschlessli-Lastwagä bringt frisches Bier.
Dr Odermatt Toni macht d'Brugg im Sagmäähl.
Dr Faarer vo Nidwaldä 13622 sell umparkierä.
Dr Pfamatter Andreas macht mit em Zurkirche Beat churzä Prozess.
Under dr Tribiinä liid einä im Gras und schnarchled.
Hinder em Tossä ziend schwarzi Wolkä uif.
Fir e Schlussgang stiigid dr Mathis Geri und dr Amstutz Chlais i d'Hosä.
Dr Amstutz Chlais gwind mit eme Churz und wird vo siinä Clubkollegä uf d'Schulterä
glipft.
Chuim isch de Schlussgang entschidä, faad's aa trepfelä.
D'Hälfer fend scho a d'Bänk und d'Tisch zämeruimä.
Am Schtrasserand verchaifid drii Goofä Alperosä-Schtrissli für zwee Frankä.
Uf dr Heifaart gid's Stai bi dr lifaart i d'Aitobaan.
Am Mändig staad i dr Ziitig, d'Innerschwiizer siigid besser gsi als Bärner.